

von Wulf Wager

Totale Ibrwachong



Die elektronische Überwachungsmöglichkeit send jo nahezu o'begrenzt. Ons wird zwar emmer vorgaukelt, es gäb so ebbes wia Datenschutz, aber au do werdat mir agloga. Es gibt jo kaum me a Plätze, wo mr net überwacht wird. Alles was em Internet läuft, wird von irgendebber irgendwo ibrwacht. Ond mithilfe vom Handy ka mr genau überprüfa, wann ond wo mr

gwää ischt, von wo nach wo mr sich bewegt hot, ond mit wem mr zsmattroffa isch, ond womöglich, über was mr gschwätzt hot.

Des wellat jetzt au dia Versicherunga nutza ond Fahra'fänger, dia a'ständig ond vorschriftsgemäß fahrat, günschtiger versichera, bzw. dia wo net a'ständig fahrat, teurer zur Kasse bitta. Sorom wird en Schuah draus. Womeglich kommat no d' Krankakassa als näggschdes ond rufat permanent da Blutdruck, da Puls ond da Alkoholgehalt em Blut ab, ond wann mr obend mit wem ins Bett ganga isch. Jeden Morga zeigt no so a Scheiß-App a, wieviel mr Stuhlgang ghet hot ond en welchra Konsischstenz. Außerdem soll jo 's Bargeld abgeschafft ond dr bargeldlose Zahlungsverkehr ei'gführt werda. No semmr vollends ganz transparent. Aber mir send jo selber Schuld. Mir gebat soviel von ons über Facebook, Twitter ond Co. bekannt ond hend onser Smartphone dauernd eigschaltet, dass mr von dr reala Welt sowieso nix meh mitkriagat. Viele lebat jo scho en ra virtuelle Welt. Do hot letscht Woch', wo dr Obama en Hannover war, an kloinr Bua da amerikanische Präsidenta a'gsprocha ond gsait: "Du, Barack, mei Vaddr hot gsagt, Du kennstest en mein Kompjudr gucka!" No hot dr Obama gsait: " Das ist nicht Dein Vater..."

Bis näggschd Woch'.
Ihr

Wulf Wager